



JAMHUURIYADDA FEDERAALKA SOOMAALIYA

XAFIISKA RA'IISULWASAARAH

BARNAAMIJKA XUKUUMADDA OO KOOBAN

2015-2016

MUQDISHO

Febaraayo 2015

TUSMADA

Tusmada.....	2
Horudhac.....	3
Xasiloona Siyaasadda.....	5
Dib-u-heshiisiinta	5
Hiigsiga 2016.....	5
Adkeynta Amniga	6
Xuquuqda Aadanaha.....	7
Cadaaladda	8
Dhaqaalaha	9
Adeegga Bulshada	9
Dawladda Wanaagga	10
Gebogobo.....	11



Mudane Guddoomiye,
Guddoomiye Ku-xigeennada,
Xildhibaanada sharafta leh,
Marti sharafta, Mudaneyaal iyo Marwooyin

Assalaamu Calaykum Warraxmatullahi Wabarakaatu

Ugu horeyn, waxaan u mahad-celinayaa Golaha Shacabka, oo i siiyey codkooda Kalsoonida 24^{kii} Bishii aynu soo dhaafnay ee Disember 2014. Waxaan si gaar ah u xusayaa soo dhaweyntii, guubaabadii iyo kalsoonidii buuxday oo aan idinka helay kulankaas.

Waxaa sharaf ii ah inaan mar kale hortinna imaado si aan u fuliyo balanqaadkii ahaa in aan muddo kooban Golaha Wasiirada iyo Barnaamijka Xukuumadda idin horkeeno, si aad u siisaan codka kalsoonida. Xukuumadda aan soo dhisay waa mid loo dhan yahay oo matasha qeybaha kala duwan ee Shacabka Soomaaliyeed. Waa Xukuumad ku saleysan helitaanka xasilooni siyaasadeed, tixgein ra'iyada kala duwan, iyo dardar-gelinta hawlaha horyaala Xukuumadda.

Barnaamijka Xukuumadda ee aan maantay idinla wadaagayo waa mid kooban, waxaase ka dambeyndoona Barnaamijka Qorshaha Xukuumadda ee sandadka 2015 kasoo noqondoona mid tafatiran, kana tarjumaya baahida iyo hawlaha mudnaanta u leh xukuumadda, lehna waqti cayiman iyo awooddii fulinta.

Gudoonka Golaha Shacabka, Xildhibaanada Sharafta leh, Mudaneyaal iyo Marwooyin.

- Sanadkaan bilowga ah ee 2015 waa sanad ay na horyaalaan hawlo aad muhiim u ah saameyn dheerna ku yeelandoona dib u hanashada xasiloonida dalka, dawlad-wanaaga, demoqraadiyadda, iyo horumarka dalka.
- Waa sanad waxqabad oo nalakaga fadhiyo dardar-galinta Hiisiga 2016 iyo hawlaha kale ee ahmiyadda koowaad u leh dawladda.
- Waa sanad ay tahay inaan ku hagno dalkeena wadada horumarka, caddaaladda iyo demoqraadiyadda.
- Marka laga reebo Hiigsiga 2016, sanadkaan 2015 waxaa kaloo na horyaala hawlo culus oo u baahan in wax laga qabto sida:
 - Xoreynta dhulka kooban ee weli ku haray Gacanta Nabad-diidka;
 - Dhamaystirka dhisidda maamul-goboleedyada ku meel gaar ka ah ee harsan;

- Baahinta Adeegga Bulshada oo hadda bilaw ah, welina aan gaarin Gobollada Dalka oo dhan;
- Gaarsiinta Caddaaladda iyo Garsoorka heerkii laga rabay;
- Horumarinta barnaamijka dhaqaalaha iyo shaqo-abuurka;
- Gaarsiinta Dawlad wanaaga iyo tayada Hay'adaha Dowladda heer sare;

Sidaa awgeed, Xildhibaanada Sharafta leh, waxaan ka codsanayaa in Golaha Wasiiradda Cusub la siiyo codka kalsoonida, si hawlahaas aan u dardar-gelino muddada yar ee ka hartay waqtigii loo cayimay.

Xildhibaanada Sharafta leh,

- Sidaan horey u xusay, Xukuumaddaan waa mid matasha qeybaha kala duwan ee Shacabka Soomaaliyeed.
- Xukuumadda siyaasaddeedu waxay ku salaysnaandoontaa nidaamka dawlad wanaagga, isla xisaabtanka, hufnaanta iyo sareynta sharciga.
- Xukuumaddu waxay dhiiragelin doontaa wadatashi iyo wadashaqayn joogta ah, ee dhexmara Madaxda dalka heer Federaal iyo heer Dawlad-goboleed, iyadoo mar walba la eegayo danta guud ee dalka iyo dadka Soomaaliyeed.
- Hawlaha ugu horeeya ee aan mudnaanta siin-doono waxaa ka mid ah:
 - Xasiloonida Siyaasadda
 - Dhameystirka dib-u-heshiisiinta
 - Fulinta Hiigsiga 2016^{ka}
 - Adkeynta Aminga
 - Horumarinta Caddaaladda
 - La-dagaalanka musuqmaasuqa
 - Kobcinta kaabayaasha dhaqaalaha iyo dakhliga dawladda
 - Kordhinta adeegga bulshada
 - Dadar-galinta dawlad wanaagga
 - Iyo dib-u-dhisidda iyo dib-u-habeynta Hay'adaha Dawladda

XASILOONIDA SIYAASADDA

Xildhibaanada Sharafta leh,

Siyaasad xasiloon oo isfaham leh, una dhaxeysa hoggaanka dalka, dawladda iyo Golaha Shacabka, heer Federaal iyo heer Dawlad-goboleed, waxay fududeynaysaa dib-u-hanashada kalsoonida Shacabka Soomaaliyeed.

Xasilooni la'anta siyaasaddu, waxay halis gelin kartaa, horumarkii dawladda ee aan gaarnay sanadihii lasoo dhaafay.

- Sidaa awgeed, waxaan dhiiragelin doonaa, wadatashi iyo wadashaqayn joogta ah, iyadoo marwalba la eegayo danta guud ee dalka iyo dadka Soomaaliyeed.
- Diyaarinta, ansixinta iyo meel-marinta shuruucda iyo siyaasadda Xukuumadda, iyo waqtiga kooban ee aynu haysano, ayaa muqaddas ka dhigaya, wadashaqayn iyo xiriir joogta ah oo u dhaxeeya hoggaanka dalka, Golaha Shacabka, iyo Dawlad-goboleedyada.

DIB-U-HESHIISIINTA

Shaki kuma jiro in sandihii u dambeeyey Arrimaha Dib-u-heshiisiinta wax badani ka qabsoomeen. Hadana wali lama gaarin in si buuxda ay shacabka Soomaaliyeed isku aaminaan iskuna cafiyaan.

- Sida awgeed, waxaan soo bandhigi doonaa siyaasadda lagu dhameystirayo Dib-u-heshiisiinta iyo waddada loo marayo fulinta siyaasaddaas, iyadoo lala tashanayo lalana shaqeynayo Golaha Shacabka, dawlad-goboleedyada iyo qaybaha kala duwan ee Bulshada.
- Waxaan dhisidoonaa Guddi khubaro ah oo talo-bixin ka sameeya Siyaasadda lagu dhameystirayo dib-u-heshiisiinta iyo habka iyo wadada ugu haboon oo loo fulin karo Siyaasaddaas.
- Xukuumaddaydu waxay dardar-gelin doontaa hawlaha Guddiga Madaxabanaan ee Dib-u-heshiisiinta, sida ku xusan Dastuurka.

HIIGSIGA 2016

Xildhibaanada Sharafta leh,

Waxaan ku dhaqaaqi doonaa fulinta Hiigsiga 2016^{ka}, si loo gaaro Demoqaraadiyad buuxda waqtiga u harsan Xukuumadda iyo Golaha Shacabka. Waxaad la socotaan in nalooga fadhiyo ansixinta iyo hirgelinta Sharciyo iyo Guddiyo muhiim u ah fulinta Hiigsiga 2016^{ka}.

- Waxaan dhisi doonaa sida ugu dhaqsiyaha badan Guddi qiimeyn kusoo sameeya heerka fulinta Hiigsiga 2016^{ka} uu marayo, soona diyaariya qorshaha iyo habka dhameystirka fulinta Hiigsiga 2016^{ka}.

- Xukuumaddu waxay muhiimad siin doontaa dhisidda, Guddiga kormeeridda iyo iskuxirka fulinta Hiigsiga 2016^{ka}, kaasoo si toos ah u hoos imaandoona Xafiiskeyga lana shaqeyn doona dhammaan Hay'adada Dawladda iyo Golaha Shacabka.
- Xukuumaddu waxay dardar-galindoontaa dhisidda Guddiga farsamada Fulinta Hiigsiga 2016^{ka} "technical team", oo hawshoodu tahay sidii si hufan oo waqtiyaysan loogu fulin lahaa hawlaha Hiigsiga 2016^{ka}.
- Xukuumaddu waxay muhiimad gaar ah siindoontaa wadatashiyada iyo wadashaqeynta Golaha Shacabka si loo dhameystiro Sharciyada iyo Guddiyada madax-banaan ee Dustuuriga ah iyo kuwa la xiriira Hiigsiga 2016 ee dhiman.
- Xukuumaddu waxay ka shaqeyn-doontaa hawl-galinta Guddiyada Madax-banaan ee Dustuuriga ah iyo kuwa la xiriira Hiigsiga 2016 ee dhisan si ay wajibaadkooda u gutaan.
- Xukuumaddu waxay sii wadi doontaa wadatashiyada iyo dhamaystirka dhismaha Dowlad-goboleedyada KMG ah ee harsan.

Xildhibaanada Sharafta leh,

Waxaan mar labaad halkaan ka cadeynayaa, in Hiigsiga 2016^{ka} iyo fulinta hawlaha baaxadda leh ee ina horyaal ku hirgeli karaan oo kaliya, wada shaqayn iyo wadatashi dhexmara Hoggaanka Dalka, Dawladda iyo Golaha Shacabka

ADKEYNTA AMNIGA

Marka hore, waxaan hambalyo iyo bogaadin u dirayaa dhammaan ciidamada iyo hawl-wadeenada ku lugta leh sugidda Amniga oo dhawaan guulo wax ku ool ah kasoo hooyay xoreynta dhulkii ku harsanaa gacanta argagixisada. Waxaan kaloo u hambalyeynayaa ciidamda AMISOM oo marwalba garab taagan ciidankeena Amniga iyo sugidda xasiloona dalka.

Amnigu wuxuu aas aas u yahay horumar walba oo aynu hiigsaneyno. Sidoo kale sugidda Amnigu waa adeegga iyo waajibka ugu horeeya ee saaran dalwadda. Hiigsiga Xukuumaddayda ee dhanka Amniga waxaa sal u ah gaaritaanka dhismaha Hay'ado Amni oo mideysan, tayo leh, wadashaqayn leh, isla-xisaabtan leh, dhowrana xuquuda muwaadinka, kana turjuma rabitaanka dhammaan qaybaha kala duwan ee shacabka Soomaaliyeed ugu dambeyna keena gaaritaan isku-filnaasho sugidda Amniga oo gaarsiisan dalka oo dhan.

Si Hiigsigaas loo gaaro, Xukuumaddu waxay sii xoojindoontaa hawlaha Amniga ee hadda socda waxayna sidoo kale qaadaysaa talaabooyin cusub sidii loo sii adkeynlahaa Amniga. Xukuumadda waxay muhiimad siin doontaa:

- Dhamaystirka xoraynta dhulka kooban ee ku haray gacanta argagixisida iyo xasilinta magaalooyinka dhawaan la xoreeyay.
- Dib-u-eegis lagu sameeyo siyaasadda, isteraatiijiyadda iyo baahida Amniga guud ee dalka ee xiligaan.

- Dib-u-eegis iyo dib-u-habayn lagu sameeyo qaab-dhismeedka iyo shuruucda ay ku dhisan yihiin Hay'adaha amniga si ay ula jaanqaadaan Dastuurka, sharciyada, iyo Dhawrista Xuquuqul Insaanka.
- Kor-u-qaadidda awoodda waxqabad ee Hay'adaha ka shaqeeya Amniga, si ay waajibaadkooda u gutaan, iyadoo la dhowrayo Xuquudda Aadanaha iyo Xeerarka Caalamiga, sida in aan la Ciidameyn Caruurta oo kale.
- Dajinta Siyaasadii iyo Barnaamijii fulinta ee isku dhafidda ciidamada heer Federaal iyo mid Dawlad-goboleedyadaba, si loo helo ciidan aan ku dhisnayn hayb ama kooxaysi oo u adeega shacabka Soomaaliyeed, lehna anshixii, tababarkii, iyo tayadii ciidan.
- Waxaan sidoo kale muhiimad siindoonaa, dib-u-dhiska Ciidamada Amniga si loo helo ciidan tayo leh, qalabaysan oo leh tababarkii loo baahna, hanan kara sugidda Ammaanka Gudaha iyo Xuduudaha Dalka. Ciidankaas oo u diyaarsanaan doona gudashada waajibaadkooda, kalana wareegi doona hawlaha Amniga Ciidamada AMISOM marka uu waqtigoodu dhammaado.
- Waxaa sidoo kale muhiim ah, xaqiijinta tirada iyo tayada ciidanka si loo sugo xuquuqahooda sida: mushaarka, deegaanka iyo daryeel nololeedkooda, caafimaadkooda oo ay ku jiraan hawlgabka, naafada iyo agoonta.
- Xukuumaddu waxay adkeyn doontaa la dagaalanka argagixisada si waafaq-san sharciyada dalka iyo kuwa caalamiga ah.
- Xukuumaddu waxay daraasad ka sameyn-doontaa baahida iyo caqabadaha Amniga ee shacabku tabanayo si waxqabad muuqda looga gaaro.
- Sugida Amniga waxaa marwalba garab-socon doona barnaamijyo sahlaya kor-u-qaadidda iyo dhawrista Xuquuqda Aadanaha iyo isku-xirka xafiisyada qaabilsan Xuquuqda Aadanaha.

XUQUUQDA AADANAHA

Dhowrida Xuquuda Aadanaha gaar ahaan durmarka iyo carruurta waxay muhiimad weyn u leedahay Xukuumaddeyda iyo caalamkaba. Waxaa jira eedeymo soo laalaabanaya ee ku aadan xadgudubyo xuquuqda durmaka Soomaaliyeed. Durmarka Soomaaliyeed waxay lafdhabar u yihiin nolosha iyo jiritaanka bulshada. Waxaa Xukuumadda iyo dhammaan shacabka Soomaaliyeed muqadas ku ah xushmeynta iyo ilaalinta xuquuqda durmarka iyo carruurta. Sidaa daraadeed:

- Xukuumaddu waxay bilaabi doontaa wadatashiyo, wacyi-galin iyo abaabulo ku aadan horumarinta xuquuqul insaanka, gaar ahaanna durmarka.
- Xukuumaddu waxay qeymeyn ku sameyndoontaa baaxadda eedaymaha xadgudubyada xuquuqda Durmarka Soomaaliyeed iyo talaabooyinka wax looga qaban karo.
- Waxaan dardar-galindoonaa hawl-galka Guddiga Madaxa-bannaan ee Xuquuda Aadanaha, kadib marka sharcigiisa la ansixiyo.

- Waxaan hubindoonaa in hawlaha lagu sugayo Amniga iyo dhawrista Xuquuqda Aadanaha ay wada socdaan isna kabaan.
- Waxaan waafajindoonaa sharciyada, siyaasadda, iyo barnaamijyada Xukuumadda dhowritaanka Xuquuqda Aadanaha.

CADAALADDA

Xildhibaanada Sharafta leh,

Markii ay bur-burtay dawladdii dhexe, waxaa bur-bur ku yimid nidaamkii caddaaladda iyo sarreynta sharciga. Bur-burku kuma koobnayn dhismayaashii saldhigga u ahaa garsoorka. Waxaa kaloo meesha ka baxay raadkii caddaaladda.

Qaybaha ugu muhiimsan ee hawlaha caddaaladda iyo garsoorka waxaa ka mid ah:

- Dhamaystirka Dastuurka oo ah tiirka ugu muhiimsan tiirarka Hiigsiga 2016.
 - Sidaa daraadeed, Xukuumaddu waxay ku dhaqaaqi doontaa hawl-galinta Guddiga Madaxabannaan ee Dib-u-eegista iyo Hirgelinta Dastuurka.
 - Si hawshaas baaxadda leh loo gaaro waa lagama maarmaan, in dhammaan qaybaha bulshada Soomaaliyeed sida ururada bulshada rayidka ah, culumaa u'diinka iyo dhallinyaradu ay qayb ka noqdaan. Waxaa muhiim ah in ay hawshaas hormood ka noqdaan Hay'adaha Qaranka oo dhammi ooy ugu horreyaan Golaha Shacabka iyo Xukuumadda.
- Xukuumaddaydu waxay dib-u-habeyn ku samaynaysaa nidaamka Garsoorka, waxayna ahmiyad weyn siin doontaa dib-u-habaynta Golaha Adeegga Garsoorka.
- Xukuumaddu waxay ka shaqeyn-doontaa dhisidda iyo hawl-bilaabidda Maxkmadda Dastuurka.
- Xukuumaddaydu waxay sameyn doontaa Guddi khubaro sharci yaqaano ah oo dib u eega, dhammaan xeerarka iyo shuruucda dalka si loo waafajiyo dastuurka iyo sharciga Xuquuqda Aadamaha.
- Xukuumaddu waxay daraasad ka sameyn doontaa baahida iyo caqabadaha Adeega Garsoorka ee shacabku tabanayo si waxqabad muuqda looga sameeyo.

DHAQAALAHA

Sannadihii ugu dambeeyey dhaqaalaha dalka wuxuu ahaa mid soo kabsanayey, balse aan gaarsiisneyn heerkii laga rabay sida sharciyadii oo aan dhameystirneyn, shaqo abuurkii oo kooban, maalgashigii oo weli yar, iyo xirfaddii hawl-wadeennada iyo shaqaalaha oo hooseysa. Si wax looga qabto arrimaha kor ku xusan:

- Xukuumaddu waxay dardar-galindoontaa dhameytirka iyo hirgalinta sharciyada, siyaasadaha, istiraatiijiyaha mudnaanta hore leh ee la xariira dhaqaalaha.
- Xukuumaddu waxay ka shaqeyn doontaa kobcinta kaabayaasha dhaqaalaha iyo dhiir-galinta dhaqdhaqaaqa ganacsiga.
- Xukuumadda waxay ahmiyad siin doontaa, horumarinta wax-soo-saarka Beeraha, Xoolaha, Kalumeysiga, iyo qaybaha kale ee lafdhabarka u ah, wax-soo-saarka, horumarinta iyo dhaqaalaha dalka.
- Xukuumaddu waxay muhiimad siineysaa in miisaaniyadda dalka loo adeegsado sidii loogu talo galay iyadoo loo marayo dhaqan-gelinta nidaam maaliyadeed hufan.
- Xukuumaddu waxay baahin-doontaa canshuur qaadidda iyadoo isla markaana xoojineysa hab maamulka iyo maareynta dakhliga canshuuraha.
- Xukuumaddu waxay hirgalinaysaa hab dhaqan maaliyadeed casri ah, lagulana dagaalamayo musuqmaasuqa. Waana nidaam fududayn doona bixinta kharashaadka Dawladda.
- Xukuumaddu waxay xoojinaysaa awoodda kormeer ee Xisaabiyaha Guud iyo madaxbannaanida Hanti Dhowrka Qaranka.

ADEEGGA BULSHADA

Sidaad wada ogtihiin, Adeegga Bulshadu muddo dheer ayuu maqnaa sababna waxaa u ahaa colaadii iyo dawlad la'aantii saameysay dalka muddada dheer.

Nasiib wanaag, inkastoo heerkii larabay aan la gaarin, hadana Adeeggi Bulshadu dib ayuu u soo laabtay si bilow ah.

- Xukuumaddu waxay dhameystiri doontaa sharciyada, siyaasadaha iyo istiraatiijiyadaha mudnaanta hore leh ee la xiriira Adeega Bulshada.
- Xukuumaddu waxay xoojindoonta baahinta Adeegga Bulshada ee dhanka Amaanka, Cadaaladda, Waxbarashada, Caafimaadka, Helitaanka Biyo nadiif ah iyo Adeegyada dhalinyarada.
- Waxaa muhiimad gaar ah la siin doonaa, gaarsiinta Adeega Bulshada gobolada gaar ahaan goobaha dhawaan laga xoreeyey nabad-diidka.
- Waxaa kaloo muhiimad la siin doonaa horumarinta waxbarsho mideysan, tayona leh. Sidoo kale, horumarinta af-soomaaliga, taariikhda dalka iyo dadka, iyo hiddaha iyo

dhaqanku waxay qeyb weyn ka noqon doonaan barnaamijka waxbarashada ee Xukuumadda.

- Waxaa sidoo kale muhiimad gaar ah la siin doonaa hoggaanka iyo iyo xeerarka adeega caafimaadka, xog ururinta iyo qorshaynta caafimaadka Dadweynaha iyo nidaamka bixinta adeegga caafimaadka
- Waxay Xukuumaddu siindoontaa ahmiyad gaar ah adeegga caafimaad ee caruurta, hooyooyinka, barakacayaasha, iyo dadka danyarta ah.
- Waxay Xukuumaddu dardar-galindoontaa barnaamijka dib u soo celinta qaxootiga iyo dib u dajinta barakacayaasha.
- Waxaannu abuuri doonaa barnaamijyo iyo tababaro dhalinyarada si ay mustaqbal wanaagsan u helaan ugana fogaadaan anshax xumada iyo falalka guracan.

DAWLAD WANAAGGA

Xildhibaanada Sharafta leh,

Waxaan ogsoonahay in burbur baaxad weyn u soo gaaray dawlad wanaagii iyo Hay'adihii dawligaba muddadii aan ku jirnay xasilooni darrada iyo dawlad la'aanta.

Dawlad wanaagga iyo dhisidda tayada hay'adaha dawladduba waxay lafdhabar u yihiin hiigsiga iyo fulinta barnaamijyada Xukuumadda. Sidaa darteed Xukuumaddu waxay qaadi doontaa talaabooyinka soo socda:

- Xukuumada waxey dhameystireysaa sharciyada iyo siyaadada dawlaga ah iyo hogaanka qaab dhismeedka maamulka Xukuumada waxey si qeexan oo tafatiran u soo bandhigi doontaa, masuuliyadaha hayadaha dawlaga ah
- Xukuumada waxey ka shaqeyn doonta isku xirka siyaasadaha heydaha dawlaga ah
- Xukuumaddu waxay adkeyndoontaa ilaalinta hantida dadweynaha iyo la dagaalanka musuqmaasuqa.
- Xukuumaddu waxay dib u habeen ku sameyn doontaa maareynta iyo hab-maamuuska shaqaalaha rayidka si tayadooda, xirfaddooda iyo waxqabadkooda kor loogu qaado.
- Xukuumaddu waxay ku dadaali doontaa abuuridda jawi ay hawl-wadeenada dawladdu ku gutaan shaqadooda si hufan oo ku saleysan raaligalinta iyo buuxinta baahida shacabka.
 - Si taas loo gaaro, waxaan muhiimad gaar ah siinayaa dhisidda guddi khubara ah oo tala-bixin ka diyaariya, sidii loo gaari lahaa Dawlad-wanaag, loona abuuri lahaa dawlad kalsooni iyo taakulayn ka heysata shacabkeeda, kana hortagta waxyaabaha keena dawladnimo xumida sida cadaalad darrada, musuqmaasuqa, takrifalka iyo wixii la mid ah.
 - Si loo helo Hay'ado iyo Shaqaale si hufnaan ah u gudan kara xilkooda iyo waajibaadkooda, kuna salaysan aqoonta iyo xirfadda shaqaalaha, si loo gaaro in

shaqa kasta uu qabto qofkii ugu haboonaa, waxaan dib u habayn ku sameynayn doonnaa habka shaqaaleynta iyo dalacsiinta shaqaalaha dawladda

- Waxaan ka faa'ideysan doonnaa aqoonyahanada iyo xirfadleyda Soomaaliyeed ee Gudaha iyo Dibadda dalka ku sugan, si aan u kordhino tayada hoggaanka iyo maamulayaasha Hay'adaha, iyo wax soo saarka shaqaalaha Dawladda.
- Waxaan ku kabi doonnaa Hay'adaha Dawladda iyo kuwa Dawlad-goboleedyada, khubaro ka caawiya xirfadaha gaarka ah, tababarka shaqaalaha, dhisidda iyo kobcinta tayada Hay'adaha.

GEBOGEBO

Guddoonka Golaha Shacabka, Xildhibaanada Sharafta leh, Mudaneyaal iyo Marwooyin.

Ugu dambeyntii, si xukuumaddu u bilawdo fulinta barnaamijka iyo hawlaha baaxadda leh ee ina horyaala uguna horeeyso Hiigsiga 2016, waxaan si xushmad ku dheehan tahay Golaha Shacabka uga codsanayaa in aad codkiina kalsoonida siisaan Golaha Wasiiradda ee Xukuumaddayda cusub.

Waad mahadsantihin, WABILLAHI TOWFIIQ

11